



梵網經心地品菩薩戒義疏發隱卷第二



姚秦三藏法師鳩摩羅什譯

陳隋天台智者大師新疏

明雲棲寺比丘袞宏發隱

明洞心居士程應衢校梓

○二正解經文 三 初重釋題二標譯人三解經

義

○初重釋題

此經題名梵網。上卷文言。佛觀大梵天王因陀羅網。千重文綵。不相障闕。為說無量世界。猶如網目。

一一世界。各各不同。諸佛教門。亦復如是。莊嚴梵身。無所障闕。從譬立名。總喻一部所證。參差不同。如梵王網也。品名菩薩心地者。亦是譬名。品內所明大士要用。如人身之有心。能總萬事。能生勝果。爲大士所依。義言如地也。

發隱重釋者何。前中大部別本之意居多。梵網心地之意未悉。故重釋也。梵網者。以喻得名。因陀羅者。此云天帝。又云天赤珠。今兼用之。言大梵天王赤珠羅網。紅光互射。寶色交輝。文彩千重。不相障闕也。引此以明十方世界。安立無量。亦復如是。十

方諸佛教門。施設無量。亦復如是。十方諸菩薩。依教修證。參差無量。亦復如是。莊嚴梵身者。諸佛本源清淨心體。名曰梵身。列之爲無量世界。開之爲無量教門。化導之爲無量修證。所以莊嚴此身。猶梵王之以珠網爲華飾也。心地者。亦喻言人身百骸竝集。必有主宰之心。菩薩衆德交修。必有要妙之用。要用者。卽本源心體戒也。萬事因之。統總猶地之承載一切也。勝果因之。發生猶地之長養一切也。經名梵網。品名心地者。以此

○二標譯人

姚奉三藏法師鳩摩羅什譯

發隱姚秦與陳隋異上姓下國別符秦也

○三解經義二 初一經首序二三分列科

發隱自爾時盧舍那佛。至本源自性清淨。此長行一段經文。原本無科。一本有科。以經後載澤山咸法師數語。人遂疑咸師所科。今就其科。稍爲更定。所以然者。諸經入文。卽屬序正流通。此經疏主判偈文方爲序分。則首列長行。無可安頓。或疏本原無。或傳寫脫失。未可知也。而詳上下文義似長行是序。偈乃重宣耳。茲不改天台舊文。但并以長行

作序。兩無妨礙。理或通焉。至於疏之或缺。或畧者。仍爲補釋。補釋經文。則發經之未疏。補釋疏文。則發疏之未鈔。故名發隱。隱者含而未露。特爲發揮而已。非敢曰有所加也。

○初一經首序二 初總陳廣畧二別明真化

○初總陳廣畧二 初正明二顯證

○初正明

爾時盧舍那佛爲此大衆。畧開百千恒河沙不可說法門中心地。如毛頭許。

盧舍那者。寶梁經翻爲淨滿。以諸患都盡。故稱爲

淨衆德悉圓。名爲滿也。

發隱諸患盡則無妄不消。止惡果也。衆德圓則無美不集。行善果也。此大衆者。指千華上佛也。恒沙無盡。毛頭至微。於無窮盡之法門。開一絲毫之心。地廣中舉畧。似拈撮土於泰山。用一滴於滄海。以少况多。極言法門之廣大也。

○二顯證

是過去一切佛已說。未來佛當說。現在佛今說。三世菩薩已學。當學今學。

發隱承上今所說法。雖云少分。實三世如來所同

說。三世菩薩所同學也。萬聖傳無異辭。千賢受無二法。可勿違歟。

○二別明真化二

初明真佛垂勅二。明化佛傳

通

○初明真佛垂勅二

初舉自修證二。令轉誨人

○初舉自修證

我已百劫修行。是心地。號吾爲盧舍那。

發隱先表此心地法門。乃自己已試之成法。明可信也。

○二令轉誨人二

初畧標二。廣述

○初畧標

汝諸佛轉我所說與一切衆生開心地道

發隱轉者傳佛語而及衆生。上承而下布之謂也。開心地道者本來心地平直。虛通無始妄情。壅塞滯礙。制之以戒。則壅去礙除。蕩然平直。而廓爾虛通矣。植立衆德。荷負衆生。皆由是起。喻如地也。此一經之要旨也。問攝心爲戒。云何名開。答。小乘之戒。僅收攝而自守。大乘之戒。兼開通而利生。故攝之義狹。開之義廣也。

○二廣述

爾時蓮華臺藏世界赫赫天光。師子座上盧舍那佛放光。告千華上佛。持我心地法門品。而去復轉爲千百億釋迦及一切衆生。次第說我上心地法門品。汝等受持讀誦。一心而行。

釋迦牟尼者。瑞應經譯爲能儒。亦云能仁。又能忍。亦直林。牟尼者。身口意。或云度沃焦。此是異說。華嚴名號品。或名盧舍。或名釋迦。今明不一不異。機緣宜開耳。

發隱蓮華臺藏者。華藏世界也。光告者。華嚴雲臺等皆說法也。千百億者。西域億有四種。十萬百萬。

千萬萬萬今千百億謂千華上百億取千萬爲億稱大千之數也。轉爲連下句言兼爲諸佛衆生也。儒者和柔仁者慈惠忍者容耐直林者住直樹林以林爲性又林者生長也皆釋迦義身口意者三業寂靜也是牟尼義度沃焦者焦石乾衆水而不溢喻凡夫渴五欲而無厭今能度之兼釋迦牟尼義也約華嚴則舍那卽是釋迦分勝劣故非一融本迹故非異今乃逐機隨緣在化度門理應開耳

○二明化佛傳通

二 初總舉諸界多佛二別顯

此界一佛

○初總舉諸界多佛類

初惟明一界二辨說餘

○初惟明一界

初受法將辭二旋歸本界三

遵勅利生

○初受法將辭

爾時千華上佛千百億釋迦從蓮華藏世界赫赫師子座起各各辭退舉身放不可思議光光皆化無量佛一時以無量青黃赤白華供養盧舍那佛受持上說心地法門品竟

發隱千佛化爲千百億千百億復化無量表心地

戒法出生無窮盡也。身放光光化佛者。表法身具無量智慧。所化之佛皆佛慧也。以無量妙華供佛者。表無量妙法。從舍那心地中出。今還以妙華供本佛。表還以妙法嚴本性也。

○二旋歸本界

各各從此蓮華臺藏世界而沒。沒已入體性虛空華光三昧。還本源世界。閻浮提菩提樹下。

發隱體性三昧者。體性由來本空。華光任運自現。如太虛遼濶雲霞日月。走飛草木萬類紛紜。起滅隱顯竝行不悖。故佛於此定。或入或出。隨心自在。

也。

○三遵勅利生

初出三昧二說法門

○初出三昧

從體性虛空華光三昧出

發隱承上入今言出也

○二說法門

出已方坐金剛千光王座。及妙光堂說十世界海。復從座起。至帝釋宮說十住。復從座起。至燄天中說十行。復從座起。至第四天說十迴向。復從座起。至化樂天說十禪定。復從座起。至他化天說十地。復至一禪

中說十金剛復至二禪中說十忍復至三禪中說十願復至四禪中摩醯首羅天王宮說我本源蓮華藏世界盧舍那佛所說心地法門品

釋迦在第四禪摩醯首羅宮說此心地品尋文始末有千釋迦與千百億釋迦各接有緣皆至舍那所受菩薩戒藏然後各坐道場示成正覺覆述說法凡有十處一在妙光堂說十世界海二在帝釋宮說十住三在夜摩宮說十行四在兜率陀天說十迴向五在化樂天說十禪定六在他化天說十地七在初禪說十金剛八在二禪說十忍九在三

禪說十願十在四禪說心地品第七會總更說前三十心十地皆約無相義爲解

發隱此明釋迦千百億身皆先於舍那前受戒乃於十處說法而此心地法門在最後說者表萬法至心而極也皆約無相者上來歷陳名相恐人執相抹心故明相本自空因緣故有卽相無相也

○二辨說餘類

其餘千百億釋迦亦復如是無二無別如賢劫品中說

發隱一百億世界佛如是覆述說法推而例之千

百億皆然也。賢劫品見大本後做此。

○二別顯此界一佛^四 初天上降魔二人間利

物三曾勸受持四重說標結

○初天上降魔

爾時釋迦牟尼佛從初現蓮華藏世界東方來入天王宮中說魔受化經已

發隱前所說法徧指諸世界之一佛今所說法專指此世界之一佛故語似重複而實不濫東方者言此界當華藏中東也問魔受化經與梵網同在天宮說何一傳一泯答魔是一期燒亂受化即休

戒乃千佛流通傳應無盡一傳一泯無足異也

○二人間利物三 初下生成道二傳法利生三

生所獲益

○初下生成道

下生南閻浮提迦夷羅國母名摩耶父字白淨吾名悉達七歲出家三十成道號吾為釋迦牟尼佛

發隱此叙釋迦下生之世界國邑父母姓氏出家修道成佛度生之大畧也下生者佛本行集經云護明菩薩住兜率天滿四千歲為彼諸天顯示法相又以天眼觀察下界見其造業受苦逼惱為欲

拔濟安樂教化衆生下生人間出家成道故下生也。閻浮提此云勝金河出金沙樹流金汁南天下也。四天下中惟此有三事勝故佛出南洲也。迦夷羅此云黃髮昔有黃色仙人於此修道大千世界此爲最中故佛於南洲生迦夷也。摩耶此云大幻以大幻術母諸佛也。白淨梵語閻頭檀也。悉達此云頓吉亦云一切義成生而吉祥萬善畢具也。七歲三十義極難辨夫十九離宮六年苦行娶妃在室生子羅云。今古共傳經律具載茲曰七歲出家則童幼未應納配三十成道則苦行過歷多年按

普集經亦說三十成道或謂苦行之後尚有五年遊歷正合三十而因果經稱牧女獻糜莊嚴經載諸天奉浴皆卽在六年之後未見有遊歷之文且本行云八歲而學書論普曜云長大而觀耕犁則知七歲出家尤爲不順也。又未曾有因緣經云佛遣目連度羅睺羅耶輸答曰如來爲太子時取我爲妻未滿九年逃入山澤六年成佛今復來求我子出家抑何酷也。則十九出家亦復不合不止是耳。只如生時亦復多說有云夏桀時者有云商末時者有云周昭王穆王平王桓王惠王等者卽如

宣律師之問天人終亦遷就不定。劉德威之咨琳老止得誕滅二時。夫以大藏經譜文各稍殊而疏主於斯。又無明釋。或謂大聖示現。何有常規。現相差殊。無足疑者。不知既已現同凡身。烏容變幻不一。大千界內。同日出家。百億國中。一時成佛。曾少異耶。當知此文。或傳寫之訛耳。問若云訛者。則昔賢何以因仍。天台曾不改定。答古人慎重闕疑。不敢輕舉。使人人恣意筆削。不出百年。古聖經律。全脫舊模矣。五十學易。不敢更文。而微意陳諸解註。八十雜華。不敢增數。而普賢號曰別行者。此也。然

則竟誰從乎。約事則十九六年。於事爲近。吾從衆。約見則機不一。見佛出家。成道亦不一。吾從機。

○二傳法利生

初應機垂化二大願重來

○初應機垂化

初橫指處會二豎明往復

○初橫指處會

於寂滅道場。坐金剛華光王座。乃至摩醯首羅天王宮。其中次第十住處所說。時佛觀諸大梵天王網羅幢。因爲說無量世界。猶如網孔。一一世界。各各不同。別異無量。佛教門亦復如是。

釋迦從初蓮華藏世界。入天宮。下閻浮提。成道號

釋迦。始於道場說法。乃至十處。

發隱此明次第周徧說法教化。一佛與前多佛同也。十住。非十住法。乃所住十處也。觀諸梵網者。正經所由名。觀梵網萬目重重。各異無量。因知佛世界亦如是。各異無量也。因知佛教化亦如是。各異無量也。千百億國。有千百億釋迦。宣揚佛化。故名梵網也。

○二豎明往復

吾今來此世界八千返。爲此娑婆世界。坐金剛華光王座。乃至摩醯首羅天王宮。爲是中一切大衆。畧開

心地法門竟

發隱金剛座者。三世諸佛。坐斯成道。無少變壞。卽實相心地也。爲此者。乃爲此界衆生。坐道場成正覺。弘法化也。此是總說。一代時教。摩醯宮中。爲是中大衆。則正說此心地戒也。嗟惟世尊之爲衆生也。悲願弘深。度化無盡。追思返此。歷數八千。且人臣。覲君咫尺。尚有常期。明主巡狩國中。猶稽年載。今乃經世界之無量。勞往返於萬迴。不爲自求。憫我等故。云何我等。覩此大恩。恬不知報。良可嗟夫。

○二大願重來

復從天王宮下至閻浮提菩提樹下。爲此地上。一切衆生凡夫癡暗之人。說我本盧舍那佛。心地中。初發心中常所誦一戒。光明金剛寶戒。是一切佛本源。一切菩薩本源。佛性種子。一切衆生皆有佛性。一切意識色心。是情是心。皆入佛性戒中。

復從天宮下至菩提樹下。爲此衆生。說盧舍那初發心所誦戒。卽是十重四十八輕。華嚴所說。文來未盡。止有七處八會。多道不起本座。不道在化樂天說法。而此經多道座起復至餘處。在化樂天說十禪定。又諸地多不相應。前後席或復同異。良由

聖迹難思。隨機異說耳。於三教中。卽是頓教。明佛性常住。一乘妙旨。所被之人。惟爲大士。不爲二乘。華嚴云。二乘在座。不知不覺。以大士階位。非二乘所行。制戒輕重。非小乘所學。大小乘戒制法不同。菩薩一時頓制五十八事。聲聞待犯隨犯隨結。理論關機宜。事論凡有三義。一。大士深信。頓聞不逾聲聞淺信。頓聞則不受。二者。大士不恒侍左右。無有隨事隨白。故一時頓制。聲聞恒得隨侍。可有小欲白佛。故待犯方制。三者。梵網所制。起盧舍那爲妙海王子受菩薩戒。爾時諸大士法。須說此五十

八種故一時頓制也

發隱初發心者。三世諸佛皆先受菩薩戒爲初因也。一戒猶言此戒。又此戒是最上第一戒也。故疏云。卽是十重等。光明金剛寶戒者。讚此一戒。破黑暗如光明。碎煩惱如金剛。具足法財功德如寶也。如來果海。此戒爲本源也。菩薩因地。亦此戒爲本源也。佛性種子者。言此戒是佛性德戒。而佛性乃衆生悉具。則此戒不獨如來菩薩本源。亦一切衆生從菩薩因。至如來果之本源也。意識色心而等之。以一切。蓋言不論是情是心。皆入佛性戒中。正

明衆生皆有佛性也。佛性云戒者。此戒爲佛性種子故也。華嚴不動而徧周。此經起座而次歷地。不相應者。如化樂不說前後異席者。如定地參差。莫因小殊。輒生疑議。當知圓融行布。妙用隨宜。時實時權。神機罔測。信受而已。三教中頓者。此戒惟明佛性專顯一乘。依此戒修。超越小果。所謂衆生受佛戒。卽入諸佛位。故名頓也。言三教者。光統三教。曰漸頓圓。南中三教。曰漸頓不定。然天台自有化儀四教。今言三者名同。南中而義異也。理論事論者。據理本無分別。自關本人具大機宜耳。據事則

多種差別。故有三義也。一信有深淺故。二隨有久暫故。三受法本然故。小欲白佛者。小事欲白佛。即得以常隨故也。起盧舍那者。此戒起舍那授妙海。而菩薩戒法五十八篇。一時頓說。古制應爾。不可變也。問座起不起。雖殊。皆明釋迦應身說法。但華嚴言釋迦。以境本定身。現起舍那。此經言舍那說。釋迦受。則先有舍那。後授釋迦。舍那又非釋迦現起者矣。二說差異。云何會通。答。釋迦證清淨法身。及報應身。而法身無形。報身有象。故舍那說此戒法。而以應身流布無盡。則知應身重復示現。化導

之儀自合。如是非但華嚴。此經亦然。故曰復從天宮。下生人世。成道轉輪。二經正同。何言其異。

○三生所獲益

當當常有因故。當當常住法身。

發隱承上佛為衆生說此戒法。當有何益。當常有因。當常住法身也。蓋此戒既佛性種子。故受之者。當永為成佛正因。不墮邪因也。當永住於清淨法身。不為色身諸欲所染也。重言當者。決當獲如是。大益也。

○三曾勸受持

如是十波羅提木叉。出於世界。是法戒。是三世一切衆生頂戴受持。

發隱專言十重。舉重以攝輕也。出於世界者。世所難值而今出焉。宜生慶幸。毋空過也。法戒者。此戒既佛性種子。是乃衆生法則之戒。故當頂戴受持。頂戴尊之至也。奉持執之固也。

○四重說標結

吾今當爲此大衆重說無盡藏戒品。是一切衆生戒。本源自性清淨。

梵網大本一百一十二卷六十一品。惟第十菩薩

心地品。什師誦出。上下兩卷。上序菩薩階位。下明菩薩戒法。從大本出。序及流通皆缺。卽別部外稱菩薩戒經。

發隱重說者。戒爲道本。不厭頻宣。故諸佛半月自誦。宣公十遍爲期。今之重說。未爲多也。無盡藏者。此戒含攝無盡。廣之則無量。戒法皆具足也。一切衆生戒者。此戒上傳千佛。下被羣生。僧俗同歸。鬼畜得與。非如聲聞戒之局也。本源自性者。此戒是佛菩薩之本源。本源者。卽一切衆生同然之自性也。性本清淨。無有污染。此戒乃復其本淨之體。非

有加於自性之外也。疏舉大本者。以經說無盡戒品。因明此戒。是梵網經多品中之一品。又一品中之下卷。例法華會門。華嚴行願之類是也。既從大本。單出另行。則序正流通。自備大本。今亦科三分者。細析之。亦自成首尾。故也。

○二三分列科二

初約義分科二隨科釋義

○初約義分科

就文爲三。從初偈長行。訖清淨者爲序。次十重訖。現在菩薩。今誦爲正說。餘盡卷爲勸說流通也。就序中。初偈明舍那發起。長行明釋迦勸發。偈中大

意四。戒三勸。四戒者。一舍那戒。二釋迦戒。三菩薩戒。四衆生戒。舍那爲本。傳授釋迦爲迹。釋迦得此戒。復授諸菩薩。諸菩薩得此戒。復傳授凡夫衆生也。三勸者。一勸受。二勸持。三勸誦。此四品戒。得之有由。根本冥傳。自下授作佛記。所以勸凡夫受。既受。須持。既持。須誦。欲使相傳不斷也。一言三序。是三佛各說。二言初序。是舍那自說。餘二是此土釋迦說。今言三序。悉是此土釋迦說。雜有經家之辭。發隱。此總明大科。後乃細列。舍那本。釋迦迹。展轉相傳。則本迹遞互無盡也。勸凡夫者。此戒根本。則

上傳千聖授記則下及凡夫故也。夫既受須持。既持須誦。而半月誦戒千載不行。我何人斯。毅然舉復於火湮之後。譬諸蜻蛉捧柱。而欲救殿閣之將頽。螭螟引繩。而欲活艤舳之在涸。所賴有力大人。共爲維持云爾。三序者偈中三科。初明舍那授釋迦。二明釋迦授諸菩薩。諸菩薩授衆生。三明勸信受持。是也。三佛者。舍那千華百億也。今從第三說者。以釋迦卽舍那也。中間叙事。是經家之辭耳。

○二隨科釋義

初序分二。正宗分三。流通分

○初序分二

初明舍那發起。二明釋迦勸發。

○初舍那發起

三

初舍那始授。二釋迦轉授。三

勸信受持

○初舍那始授

二

初明本迹。二明人法。

○初明本迹

三

初舍那本身。二釋迦跡佛。三總

結本迹

○初舍那本身

我今盧舍那。方坐蓮華臺。

上句明舍那本身。下句明舍那本土。此卽依正兩報佛身四種。一謂法身。二謂真應。三謂法報應。昆盧徧耀正法爲身。舍那行滿報果爲身。釋迦應跡

赴感爲身也。舍光攝論名法應化。若更四身者。應見受純陀供。化身受大衆供。我今者。八自在我也。舍那者。無明塵垢永盡。智慧功德圓備。如淨滿月。以名表德也。方坐蓮華。下句明依報。方者正也。安住正法。故云坐也。何故坐蓮華臺。世界形相似蓮華。故云蓮華藏。華嚴云。華在下。擎蓮華二義。處穢不污。譬舍那居穢不染也。藏者。包含十方。法界悉在中也。臺者。中也。表因能起果。故譬臺也。又以本佛坐於華臺。又表戒是衆德之本。

發隱舍光攝論攝論多本言舍光以別也。佛有四

身。舉一曰法。舉二曰真。曰應。舉三曰法。曰報。曰應。而今云四身者。以應化分二身故。地持云。佛有二色身。實色修感。化色現形。卽應化二身也。故云現同始終。曰應無而倏有。曰化。旣以現身受純陀最後之供。又有身別受大衆之供。則一應一化也。八自在我者。涅槃云。第一能示一身多身。乃至第八身如虛空。存沒隨宜。如是之我。非情見我相之我也。如淨滿月者。塵垢永盡。如無雲之淨月。功德周圓。如旣望之滿月也。蓮華二義者。一處濁義。二不污義。譬舍那居穢土。又居穢土而不染也。藏者。華

舍法界表戒舍萬法也。臺者臺以中位爲因而成。華表戒以中道爲體而成聖也。本佛者舍那坐於華臺而爲諸佛之主。表戒法原於心地而爲衆德之本也。

○二釋迦迹佛三 初明迹中之本二明迹中之迹三明本迹俱成

○初明迹中之本

周匝千華上復見千釋迦

周匝千釋迦。望百億國釋迦。千爲本。百億爲迹。故兩重本迹。千華者。人中華有十餘葉。天華百葉。佛

菩薩華千葉。一葉有一佛世界。故有千佛淨土。表十地十波羅密。圓因起應。果之本地。觀千釋迦。一葉一淨土。卽是一佛世界。起圓應身。又一世界中一佛國土。此猶畧說華嚴微塵世界也。十方。方各一百也。

發隱兩重本迹者。舍那爲本。千釋迦爲迹。千釋迦爲本。百億爲迹也。喻如國王爲本。百官爲迹。百官爲本。萬民又爲迹也。葉者花瓣。十百千葉。據功德小大而成。今從千佛。且說千葉。細推則自萬而億。亦應無量也。十地者。言淨土表十地。十地諸度。以

圓因而起圓應之果。則度復舍度。度度不窮。卽淨土一佛。以圓心而起圓應之身。亦身復分身。身身不盡也。言畧說者。華嚴重重無盡世界。如微塵然。乃名廣說。今猶畧耳。十方各一百者。十百爲千。證千釋迦也。

○二明迹中之迹

一華百億國。一國一釋迦

一葉一世界。有百億國土。娑婆百億國。是一葉之上耳。

發隱一華卽一葉。非全葉也。上明一葉上一釋迦

今明一葉之上。復有百億國。則有百億釋迦前迹。爲本復生後迹。故云迹中迹。猶賓中賓也。

○三明本迹俱成

各坐菩提樹。一時成佛道

發隱本佛迹佛。不分前後。一時成佛。表體用無二道也。

○三總結本迹

如是千百億。盧舍那本身。

初句結迹身。下句結本身。明千百億。皆以舍那爲本。

發隱雖名本迹。勿生二想。千百億身。卽舍那一身耳。千江散影。長空止見孤輪。萬口傳聲。空谷曾無二響應化無窮。法身不動。亦猶是也。

○二明人法 二 初明人二明法

○初明人 三 初明能接二明所接三結能所接

○初明能接

千百億釋迦。

能接之人。是千百億釋迦也。

發隱自覺已圓。力能覺他。名能接人。千百億釋迦是也。

○二明所接

各接微塵衆

接者。取有緣之義也。微塵者。聽衆多也。

發隱各接者。千百億佛。接千百億塵衆也。接取有緣。揀無緣不接也。問接。無緣何名。曾度。蒼青帝。慈仁。無以芽焦核。越人神聖。不能生死人。無緣可。以盡度。今日當無衆生矣。故曰取有緣也。

○三結能所接

俱來至我所

俱至舍那所聽戒也

發隱我者舍那自我能所俱至表體用歸一心也

○二明法 二 初說戒二嘆戒

○初說戒

聽我誦佛戒

誠菩薩聽也。誦佛戒者。問何故誦不道說耶。答。此
是三世十方諸佛之法。非始自作。故祇得稱誦不
得道說

發隱說者創陳已見。誦者讀習前言。猶述而不作
意也。三界大師躬親誦戒。况其餘乎。

○二嘆戒

甘露門卽開

甘露門者。譬服甘露。令人長壽不死。要因此戒得
至涅槃常樂我淨。教能通理。譬之如門。又戒能濟
拔。免離生死。譬如甘露服得命長。大經云。有山從
四方來。惟當持戒布施也。

發隱服持聖戒。而安住涅槃。喻如飲甘露者。輕身
不死也。依由聖戒。而進趣佛境。喻如得其門者。身
入樓閣也。戒能濟拔。下文似濫前。然前云長壽自
永處涅槃之極位言也。如平時服之得仙道。故後
云濟拔。自暫離生死之苦果言也。如病患服之得

痊可故故不相濫

○二釋迦轉授

初序釋迦傳授緣由二明釋

迦授諸菩薩三勸菩薩授諸眾生

○初序釋迦傳授緣由

是時千百億還至本道場 各坐菩提樹誦我本師

戒

三句明千百億佛各還本處然法身無在。今初明

迹傳本戒則本為迹師以迹誦本故也

發隱本道場表本心菩提樹表覺體言以本心覺

體持本戒也法身無在言法身雖無在以迹誦本

亦有在也

○二明釋迦授諸菩薩

三

初戒體二戒用三勸

持

○初戒體

十重四十八

發隱此一句攝全部戒法奉持之要良在於斯故

云體也

○二戒用

戒如明日月亦如瓔珞珠

持此戒能除罪霧譬之於日使得清涼喻之若月

富有善法。如瓔珞珠。又日能長萬物。戒亦如是。能生長萬善。又如瓔珞。能差貧窮。戒亦如是。能差衆生貧。長善法財。又如日月麗天。無不瞻仰。持戒在體。無不歸崇。瓔珞在身。莊嚴第一。持戒離醜。如端正也。

發隱開罪障霧。滅煩惱火。止惡益也。富有萬法。生長萬善。行善益也。差貧離醜。乃至歸崇。亦止行意。離醜有二。一者以身心言。由此戒故。內無邪念。離心醜也。外無過動。離身醜也。二者以因果言。今生持戒來生當得相好端嚴。離報醜也。

○三勸持二

初能授人二所受人

○初能授人

微塵菩薩衆。由是成正覺。是盧舍那誦。我亦如是誦。

如人渡海。必假舟航。若渡生死。要因於戒。大經云。如憑船筏。又喻浮囊。

發隱微塵菩薩者。言無量賢聖。由受此戒成佛。况凡夫乎。故云勸持。持必由授。能授者何。舍那自誦。我亦隨誦。况諸菩薩乎。舟筏浮囊。濟川之具。喻持戒。得超生死海。至涅槃岸也。浮囊或革或脬。或木

中空外浮。駕之而涉江湖。則不沉溺。故有羅刹乞
浮囊之喻也。

○二所受人

汝新學菩薩頂戴受持戒

發隱始聞戒者皆名初學。上言微塵菩薩。由茲成
佛。則新學可知。舍那釋迦佛。佛自誦。則餘人可知。

○三勸菩薩授諸衆生

受持是戒已轉授諸衆生

三十心菩薩轉授外凡發大乘心也

發隱三十心者。據別教住行向爲內凡。十信爲外

凡則此衆生指信位也。推而極之。先聞戒者轉授
未聞。則次第無盡也。

○三勸信受持二

初出所誦法二勸人信受

○初出所誦法

諦聽我正誦佛法中戒藏。波羅提木叉。

此戒簡異外道雞狗等戒。淨戒爲因。木叉爲果。

發隱簡異者。簡別佛法中戒。異於外道中戒也。波

羅提木叉者。此云保解脫。保衛三業得解脫也。亦

云別解脫。持一事得一解脫。別別不同故也。因果

者。依戒法因。至解脫果故也。

○二勸人信受 三

初勸信二勸受三結勸

○初勸信

大衆心諦信。汝是當成佛。我是已成佛。常作如是信。戒品已具足。

所以爾者。信是入道初門。大論云。信爲能入。我持此戒。得成正覺。汝亦應爾。

發隱諸佛已成。衆生當成。則生佛畢竟非殊。持戒定可作佛。當諦信如是事。勿懷疑也。戒已具足者。一念信心。萬惑俱遣。防非止惡。盡在於斯。何待遮難重詢。錫磨三舉。然後爲戒乎。佛唱善來。卽成沙

門。正此意也。是知放下屠刀。千佛一數。爲有信故。毀訾不輕。千劫墮落。爲無信故。信爲入道之門。豈虛言哉。

○二勸受

一切有心者。皆應攝佛戒。衆生受佛戒。卽入諸佛位。位同大覺已。真是諸佛子。

凡有心者。皆得受菩薩大乘常樂等。明衆生有心。所有佛性。要當作佛。須受三戒。

發隱有心者。言惟除木石無心則已。六道含靈。皆應受戒。攝者納義。外聞內納。永持而勿失也。佛位

至遠云何受戒卽入。蓋此戒是千佛相傳心地。佛由此成佛。受佛戒者。豈不卽入佛位耶。大乘常樂等者。明佛戒是大乘常樂我淨之大戒也。三戒者。三聚大戒也。有佛性者。皆當作佛。此三聚戒成。佛正因。安得不受。是故惡無不除。善無不備。生無不度者。佛也。攝律儀。攝善法。攝衆生者。受戒所以入佛位也。問。位旣同佛。何不名佛。而纔名佛子。答。位雖同佛。功德未圓。如儲君決當五位。今在東宮。則灌頂王子也。名之王子。必紹王位。名之佛子。必紹佛位。豈細故哉。

○三結勸

大衆皆恭敬。至心聽我誦。

上句結下句。誠聽。總明諸佛傳授戒法。發起序竟。發隱。佛自重戒。故勅大衆至心。今誦戒於千載之下。可不如對佛面。如聞佛語乎。恭者外肅敬者內虔。內外精誠。是名至心。心地戒品。若非至心。何由得入。

○二釋迦勸發二

初經家叙辭二釋迦自說

○初經家叙辭三

初佛欲結戒二放光表瑞三

大衆願聞

○初佛欲結戒 四
道四出戒法

初標化主二指處所三明得

○初標化主

爾時釋迦牟尼佛

化主大聖釋尊也

發隱化主者先標人大聖釋尊者次表德也居聖位之極果故云大聖爲釋子之共宗故云釋尊化導之主非此其誰能之

○二指處所

初坐菩提樹下

樹下得道因名道樹亦曰思惟梵音貝多也

發隱今初字聯後文初字爲意初成道果卽最初結戒急先務也菩提此云道道卽思惟思惟者梵語貝多也道卽思惟者禪思不亂乃道體也

○三明得道

成無上正覺已

卽正徧知號

發隱法無有差曰正智無不周曰徧破生死夢曰覺合之則所覺者旣正且徧也今日正覺正中自具正徧二義無上者此覺雖衆生同具未至於佛

猶爲有上。成妙覺佛。智盡獨尊。曰無上也。

○四出戒法四 初標所結名二能成勝因三能

得勝果四正結名字

○初標所結名

初結菩薩波羅提木义

發隱標菩薩者。簡非聲聞。是大乘菩薩波羅提木义也。初意見上

○二能成勝因

孝順父母師僧三寶

寶藏經云。孝事父母。天主帝釋。在汝家中。又能行

孝。大梵尊天。在汝家中。又能盡孝。釋迦文佛。在汝家中。睽魔菩薩。親服患愈。慈心童子。火輪速滅。卽其靈應。爾雅云。善事父母爲孝。孝卽順也。大史叔明。用順釋孝。孝經鈞命訣云。孝字訓究竟。是了悉始終色養也。亦可訓度。度是儀法。溫清合宜也。**發隱承上初結菩薩戒法**。而戒雖萬行。以孝爲宗。故曰孝順父母師僧三寶。言帝釋等者。天心佛心。皆欲人孝順而已。善事父母。謂奉養無方。服勤有道。孝之始也。帝釋臨焉。又能行者。凡是孝道。無不舉行。孝之中也。梵王臨焉。又能盡者。現生父母。前

生父母。歷生父母。無不酬報。孝之終也。釋迦臨焉。天能聽卑。佛徧一切。簡在冥加。理有之也。故睽魔割目救父。而沉痾愈於一朝。慈心發願代苦。而火輪消於頃刻。至行動天。真誠感佛。正猶是耳。恐世不信。謂云何天佛。得在爾家。故引二事以證之也。爾雅叔明。訓孝以順。鈞命訓孝。自有五義。摘其二。者。曰究曰度。然彼書以究屬士。度屬諸侯。今取其文。不用其意。畧爲三義。一曰順者。承顏養志。無所違忤。如曾參閔損之類是也。二曰究竟者。了悉始終。一心無間。現柔和色。務悅其親。如大舜萊子之

類是也。三曰度者。昏定晨省。夏清冬溫。儀度周備。如文王薛包之類是也。師僧者。是已和尚。非泛僧也。例寶藏義。亦可分三。事者奉養師身也。行者遵循師訓也。盡者傳揚師道。普利衆生也。三寶亦然。事者供養三寶。未必能行。行者依從三寶。未必能盡。盡者紹隆三寶。上承下化。功德周隆也。經舉三種孝由。疏惟釋一者。父母於人。最爲切近。舉一以例餘也。又師僧三寶。亦名父母。法身由和尚教誨之力。而生。卽法身父母也。慧命由三寶薰修之力。而得。卽慧命父母也。

○三能得勝果

孝順至道之法

發隱戒之爲義。固在孝順。而此孝順。人將謂是庸行之常。不知孝順之法。乃至道之法也。至道者。至極之道。卽無上正覺是也。此道清淨廣大。猶如虛空。體絕過非。用無違礙。順之至也。孝順之心。正合此道。故云至道。又父母者。本覺義。師僧者。先覺義。佛者。滿覺義。法者。顯覺義。僧者。合覺義。於此隨順。不背不逾。豈非如來所證。無上正覺之妙道耶。道而曰至。揀非偏淺。故云勝果。蘭益疏云。大孝釋迦。

尊累劫報親恩。積因成正覺。勝因勝果。此之謂也。仲尼贊孝曰。至德要道。又謂聖人之德。無以加於孝。而程子亦以性命孝悌爲一事。孝曰至道。其誠然乎。一說。例上三種。以成四境。言當孝順。此至道之法。則是因非果。故今不用。

○四正結名字

孝名爲戒。亦名制止

是制戒也

發隱承上因勝果勝。此結而斷之。直以孝名戒也。法苑云。戒卽是孝。謂衆生皆吾父母。不殺不盜。是

卽爲孝。意正同此。然是戒名爲孝。未是孝名爲戒。今明孝順自具戒義。如孝順父母。則下氣怡聲。言無曠逆。是名口戒。定省周旋。事無拂逆。是名身戒。深愛終慕。心無乖逆。是名意戒。順止惡義。恐辱其親。名律儀戒。順行善義。思顯其親。名善法戒。順兼濟義。捨椹回兇。捨肉悟主。錫類不匱。名攝生戒。師僧三寶。亦復如是。以要言之。但能孝順。自然梵行具足。戒之得名。良以此耳。舍孝之外。寧有戒乎。優婆塞戒經云。受持戒已。不能供養父母師長者。得罪。正言孝是戒也。亦名制止者。言制止亦以孝名。

也。制爲戒法。以止其惡。謂之制止。今惟孝順。自不造惡。豈非制止。孝經云。孝親者。非法不言。非道不行。亦止惡意也。上戒字。泛指戒體。下制止。則指所列戒品。如十重四十八輕是也。只一孝字。可槩戒義。故下制戒中。十重第一第二第三第四。以至第九第十。皆曰孝順心。輕垢第一。卽曰孝順心。而三十七二十九三十五四十八。亦皆曰孝順心。至於餘戒。多舉父母爲言。則是貫徹乎十重之始終。聯絡乎四十八輕之首尾。一孝立而諸戒盡矣。復次孝順。非特名戒。名制止。亦名三藏諸教。一切法。

門攝無不盡。問法門無量。未易悉數。只如淨土往生。一法門耳。此經之中。言所不及。云何孝順。貫一切法。答。十六觀經云。欲生彼國。當修三福。一者。孝養父母。奉事師長。慈心不殺。修十善業。二者。受持三歸。具足眾戒。不犯威儀。乃至三者。發菩提心等。夫養父母。事師長。受三歸。非孝順父母。師僧三寶乎。曰。不殺。曰。十善。曰。眾戒。曰。威儀。而戒無弗備矣。是知戒不離孝。諸經互出。以孝爲因。乃得往生。則此經實該淨土法門。但人自不察耳。是故念佛修淨上者。不順父母。不名念佛。父母生育。等佛恩故。

不順師長。不名念佛。師長教誨。同佛化故。不順三寶。不名念佛。所寶雖三。統一佛故。盡理而言。順淨覺心。而不逆以濁染。是孝名念佛。順慈惠心。而不逆以慳貪。是孝名布施。順和柔心。而不逆以瞋恚。是孝名忍辱。順堅剛心。而不逆以懈怠。是孝名精進。順寂靜心。而不逆以散亂。是孝名禪定。順靈知心。而不逆以愚癡。是孝名智慧。類而推之。一切不逆。則萬法俱成矣。大哉孝也。豈獨名戒而已哉。

○二放光表瑞

佛卽口放無量光明

瑞者信也。欲說大事。前須放光。故稱爲瑞。光是色像之勝。放勝光明。召有緣衆。同來聽戒。戒是諸善最勝。能滅惡生善。口放者。表釋尊今日宣說大乘菩薩戒法。

發隱前須放光者。良由勝事欲興。休徵先現。况此心地戒道。傳千佛。化被羣生。事莫大於此者。安得前無瑞應耶。色像之勝者。小則甘露醴泉。大則雨花動地。乃至放光。皆色像所攝。有形之瑞也。而惟放光獨勝者。以其有揚輝破闇之功。具滅惡生善之義。見之者發菩提心。觸之者離生死苦。諸瑞之

中。此爲最勝。喻戒爲諸善最勝也。口放者。二義。一者。表此戒法。金口敷宣。二者。表此戒法。菩薩聽受而成勝果。從佛口生也。

○三大衆願聞
初總叙大衆二別叙四衆三
時衆樂聞

○初總叙大衆
是時百萬億大衆

發隱人天共會。凡聖交羅。故云大衆

○二別叙四衆

諸菩薩。十八梵天。六欲天子。十六大國王

一菩薩二十八梵。三六欲天。四十六國王。十六國者。名出長阿含。一史伽。二摩竭提。三迦尸。四拘薩羅。五跋祇。六末羅。七支提。八跋沙。九尼樓。十槃闍羅。十一阿濕波。十二婆蹉。十三蘇羅。十四乾陀羅。十五劔浮沙。十六阿槃提。西土諸國甚多。畧舉此耳。機應聞聲。自然雲集。

發隱前叙大衆。今舉勝也。菩薩對聲聞爲勝。梵天對欲天爲勝。欲天對人間爲勝。國王對臣民爲勝。彰此戒法爲凡聖人天殊勝之高會也。

○三時衆樂聞

合掌至心聽佛誦一切諸佛大乘戒

發隱合掌身業淨也。至心意業淨也。耳聽則心專而言自寂。口業淨也。聽法者當如是矣。

○二釋迦自說三

初舉我自誦二放光因緣三

勸物習學

○初舉我自誦二

初序自誦二勸人誦

○初序自誦

佛告諸菩薩言。我今半月半月。自誦諸佛戒法。

發隱此萬世誦戒立法之始也。半月半月者。望日晦日也。月勤二誦。恐遺忘也。又白月黑月。喻善業

惡業應自考也

○二勸人誦

汝等一切發心菩薩。乃至十發趣。十長養。十金剛。十地。諸菩薩亦誦

凡舉五位人。一發心。謂共地菩薩。二。十發趣。謂初十心。依梵網列名。一捨。二戒。三忍。四進。五定。六慧。七願。八護。九喜。十頂心。三。十長養。謂中十心。一慈。二悲。三喜。四捨。五施。六好說。七益。八同。九定。十慧。四。十金剛。後十心。一信。二念。三回向。四達。五圓。六不退。七大乘。八無相。九慧。十不壞心。五。十地。謂登

地以上。一體性平等地。二體性善方便地。三體性光明地。四體性爾炎地。五體性慧照地。六體性華光地。七體性滿足地。八體性佛吼地。九體性華嚴地。十體性入佛界地

發隱共地菩薩者。十信發心。與佛共地。一云。卽三乘。共十地也。發趣長養金剛。分初中後。名三十心。初十心。卽住位。一捨心。內外法一切捨也。二戒心。一道清淨也。三忍心。一切法如忍相不可得也。四進心。以無生入世諦無二相也。五定心。念念寂滅。三界一切性皆因定滅而生也。六慧心。修不可說

觀入中道一諦也。七願心。初發心求中間修道行願滿故。一切行之本源也。八護心。護三寶一切功德。空無相無作也。九喜心。見他得樂。常生喜悅。不入有爲緣一切法也。十頂心。一道最勝。不受六道果。必不退佛種也。中十心。卽行位。一慈心。於無我智中樂相應觀。使一切衆生得慈樂果也。二悲心。於空見一切法如實相。怨三品中與上樂也。三喜心。悅喜無生。使衆生入正信捨邪見。背六道苦。故喜也。四捨心。自他體性不可得也。五施心。內身外身國城男女皆如如相。受者施者無合無散也。六

好說心。以聖法語教諸衆生也。七益心。現形六道無量苦事。不以爲患。惟益人爲利也。八同心。入諸六道。一切事同空同無生同無我等也。九定心。見一切我人內外衆生種子。皆無合散集成起作也。十慧心。觀諸邪見結患等。無決定體性也。後十心。卽向位。一信心。空一切法。心心空故。信信寂滅。名無相信也。二念心。六念常覺常施。第一義空。無着無解。生住滅相。不動不到不去來也。三迴向心。入法界常寂滅也。四達心。忍順一切實性。法達義達。辭達教化達。三世因果。衆生根行。如如不合不散。

也。五圓心。直照入無生智。教化十方衆生。皆入薩婆若也。六不退心。不入一切凡夫地。不起諸見。不起集因也。七大乘心。解一空故。任一切衆生度。三界河。趣入佛海也。八無相心。一切結業。三世法。如如一諦而行於無生。一切佛我師。一切賢聖我侶。皆同無生也。九慧心。一切法魔說。佛說。皆分別入。二諦處。非一非二。非有陰界入也。十不壞心。入聖地智。近解脫位。得修正門。明菩提心。八魔不動。衆聖摩頂。諸佛勸發。得金剛三昧。入一切行門也。十地。平等地。至入佛界地。卽歡喜至法雲十地是也。

一平等地。從一佛土入無量佛土。從一劫入無量劫。常入二諦。而在第一義中也。二善方便地。清淨明達。一切善根。慈悲喜捨等法也。三光明地。以三昧解了智。知三世諸佛法門。現六道身。一音中說無量法品也。四爾炎地。不斷不常。卽生卽住。卽滅修行無量功德。行行皆光明。教化一切衆生。使見佛性也。五慧照地。以十力智。知自修因果。亦知一切衆生因果。以淨國土爲惡國土。以惡國土爲淨國土也。六華光地。十神通。明智。示一切衆生種種變化也。七滿足地。欲足。進心足。念心足。智慧足。解

脫足六通足於一切佛國示現作佛也。八佛吼地入法王地三昧。其智如佛。以法藥施一切衆生爲大法師。爲大導師。百千陀羅尼門。三昧門。金剛門。神通門。解脫門。如是百千虛空門。平等門。中而大自在。劫說非劫。非劫說劫。等無不如意也。九華嚴地。以佛威儀如來三昧。出入無時。百億四天下。一時成佛。現無量身。口意說無量法門。而能轉魔界入佛界。佛界入魔界。一念心中。現無邊神用也。十佛界地。空空復空。如虛空性。平等智。十功德品。具足有不可說奇妙法門。品奇妙。三明。三昧門。陀羅

尼門。非下地所知。惟佛佛無量身。口心可盡其源也。地地經中。皆言無量功德。今始舉少分。如毫毛許耳。此三十心十地。與華嚴諸經。名小不同。其實則一。亦誦者舉况之辭。菩薩尚誦。何況凡小。問此言共地。與善戒中。分十二住爲七地。六菩薩地。一菩薩如來共地。同異何如。答。彼要其終。以果言也。謂菩薩修行至此。同如來故。此原其始。以因言也。謂初發心。卽同如來故。又此經以心地爲宗。此三十心。正心地。種種法門。十重四十八輕。皆三十心中戒心中出。如制戒中所明問。十地何不言心。答。

三十心。是十地之因。至十地。則所發心。成就圓滿。上荷佛法。下載衆生。有地之象。故易心言地實心。外無地也。

○二放光因緣二 初直說緣二列因緣

○初直說緣

是故戒光從口出

發隱口能出光名緣。必有由致名因。今言光自口出。直說緣。未說因也。

○二列因緣二 初表得果二表行因

○初表得果

有緣非無因故光。光非青黃赤白黑。非色非心。非有非無。非因果法。

得果有三。一非青黃色心。二非有無。三非因果法。

發隱意謂有緣必有因故光。光是所得之果。必有

因以致之也。非青黃色心。不墮妄境妄情。凡小之

果也。非有無。不墮執斷執常偏見之果也。非因果。

不墮有修有證權乘之果也。此心地戒。本自超情。

境離斷常。絕修證。故其得果如是。問既曰有因。曰

得果。又曰非因果法。何也。答此有二義。一者非世

間之因果。二者非因非果。乃所以爲正因正果也。

○二表行因

是諸佛之本源。行菩薩道之根本。是大眾諸佛子之根本。

行因三者。一諸佛本源。二菩薩根本。三大眾根本。或言表真俗兩諦。

發隱諸佛正徧知海。汪洋無盡。此心地戒爲之本源也。菩薩萬行開敷。成就妙果。此心地戒爲之根本也。一切衆生。生生不窮。乃至後當作佛者。亦此心地戒爲之根本也。徹聖通凡。咸因此戒。戒因清淨。淨極光通。有自來矣。或言真俗二諦者。佛是出

世間法。真諦也。衆生是世間法。俗諦也。菩薩上趣聖果。下順凡情。真俗雙顯也。

○三勸物習學二

初標四勸二釋四勸

○初標四勸

是故大眾諸佛子。應受持。應讀誦。應善學。

一勸受。二勸持。三勸讀誦。四勸學。

發隱受者領納不拒。持者操執不忘。讀誦者口演其文。善學者力行其事。聞而不受。則聽不關心。受而不持。則已領還失。持而不誦。則守愚不諳其詳。誦而不學。則空言終何所益。功貴兼全。故曰四勸。

也。然總標云四戒三勸。止是受持讀誦而已。不說善學。舊本善學上無應字。連下文佛子爲句。似爲穩當。何者。以十重結文中。有善學諸仁者句。與此正合。今標四勸。或恐後人之訛。未必出疏主意。覽者詳之。

○二釋四勸

佛子諦聽。若受佛戒者。國王王子。百官宰相。比丘比丘尼。十八梵天。六欲天子。庶民黃門。姪男姪女。奴婢八部鬼神。金剛神。畜生。乃至變化人。但解法師語。盡受得戒。皆名第一清淨者。

但釋勸受一事。餘皆畧也。

發隱黃門者。內宦之通稱也。金剛神者。有大威力。能捍外魔。護佛法。喻如金剛也。變化人。非如來所作化人。應是天龍鬼畜變化而成者也。以要言之。王類。臣類。僧類。尼類。天類。人類。鬼類。神類。畜類。化類。乃至一切種類。皆可作戒器。但欲其能解法師語耳。云解則揀不解者。但解語者。便得受戒。但受戒者。便得清淨。蓋未受戒前。容有淨染。既受戒後。俱成淨器。如百川入海。同一鹹味也。此文與第四十輕中大同。但彼不列畜生。此不列無根二根。蓋

彼文一切中攝畜生此文責尸中攝無根二根也。但釋勸受者由受乃有持誦故釋勸受以兼其餘也。問聲聞戒重難輕遮稽防特甚菩薩戒姪賤鬼畜容納無遺豈小果乃皆良器大士反雜非人也耶。答聲聞稟佛剃染若不揀擇恐損正法故菩薩專主利生若不兼容化度有限故但普度中亦自有別後四十八輕垢中詳辨茲不煩說。

梵網經心地品菩薩戒義疏發隱卷第二

